

STRONG BILONG OL MERI LIDA LO HAUSLAIN/PLES: OL STORI IKAM LONG OL LIDA BILONG LUMUSA INSAIT LONG PNG MERI FAMA BISNIS PROJEK

Stori bilong Mevis

Mevis i tok em i nogat tru save bilong wok lidameri taim em yangpla iet, em i stori long em iet olsem em save 'bihainim tasol' na papa mama bilong em olsem ol 'liklik ples lain tasol'. Em i marit na lusim ples bilong em sampla yia. Taim em brukim marit wantaim man bilong em, em igo bek long Lumusa na em i statim wok bilong em wantaim ol meri long hauslain, we em i luksave olsem em kamap wanpela komyuniti lida, na em i mas gat sampela save em i mas kisim. Em i save beten/pre oltaim long kisim save bilong wok na pasin bilong lida – we iken sapotim em long kamap wanpla gutpla lida na long helpim em long skelim gut tingting na kamapim gutpla ol tok na wok.



Mevis tok, sampla taim skul bilong kamap lida bilong projek i kirapim na pusim em long go toktok strong na tok tambu long ol man/meri i tok baksait nabaut, na long dispela, ol sampla lain i tok pait wantaim em, na i no save behainim na wokim ol samting ol i toktok long wokim o kamapim. Em tu save lukim ol lain i no save putim iau long toktok na tok skul bilong ol het man/meri, na sampla taim ol save abrusim taim bilong ol miting o ino save kam. Na tu long ol bung o miting, ol manmeri save toktok namel long ol iet go kam na i no save putim iau gut taim Mevis i toktok stap. Tasol, Mevis tok, long ol dispela kain hatpela rot, em i helpim em long kamapim pasin bilong kisim bel isi na skelim gut as bilong pasin bilong ol lain.

Tasol antap long olgeta dispela samting, Mevis tok, dispela wok bilong kampa lida na skul i helpim em gut tru, na i senisim em tru. 'Dispela skul i helpim mi gut tru long kamapim mi olsem wanpela lida. Ol dispela gutpela save bilong kamap gutpela lida i mekim mi kamap narapela kain meri'. Mevis i mekim ol gutpela toktok moa long wanpela skul/trening ol kolim 'model farm', na strongim ol hauslain tisa ol i save kolim 'Village Community Educators' long kisim skul long en tu. Em tok dispela skul i helpim em long kamap long gutpela mak long laip bilong em iet na long femili bilong em, na tu em helpim em long tokaut na skelim ol dispela save wantaim ol arapela manmeri.

Mevis i gat bikpela laik long lainim moa insait long pasin bilong kamap lida, na sampela ol skul bilong wok fama; em long ol rot bilong kamapim ol kaikai olsem aniani bilong salim na kisim mani, na tu em gat laik long lainim ol save bilong lukautim kakaruk. Em igat driman long gat wanpela bikpela fam na long dispela, em i laik kisim papa mama bilong em i kam stap wantaim em bambai em iken inap long sapotim tupela. Em tu igat tingting long tokim olgeta arapela femili bilong em i stap nabaut na ol arapela lain manmeri long kam sapotim dispela driman bilong em. 'Mi wok long tingting long ol dispela samting, bilong wanem, mi laik kamap wanpela gutpela piksa long wokim ol dispela samtum we ol arapela iken bihainim. Mi igat strongpela tingting long bihainim na kamapim truru wok long dispela save mi kisim long ol lain bilong projek, na tu long skul bilong 'model farm' bai i inapim dispela driman bilong mi. Mevis i laik stap olsem wanpela gutpela piksa bilong soim rot long ol narapela, na ino long nem bilong dispela projek tasol, nogat, em bilong em na femili bilong em long behain taim tu. Dispela em i lidasip stori bilong em.

Mevis em i wanpela bilong ol planti Hauslain Tisa (VCE) insait long PNG husait istap insait long dispela projek we ACIAR i givim moni na sapotim. Mipela i serim stori bilong em wantaim tok orait bilong em.

Go long <http://pngwomen.estem-uc.edu.au/> long painim aut moa long dispela projek.